

## gentechnologe-lied

### räpperei mit „kleiner kneipe“

**Text: Hans Jürg Zingg**

**Melodie-Zusammenstellung: Hans Jürg Zingg**

**(Die kleine Kneipe: Michael Kunze / Pierre Kartner)**

**Begleitung (Gitarre, Stimme): Alain Bricola**

wi geits wi schteits hesch aids hesch chräbs  
oder hesch nume d nachrichte ghört  
he mou gibts zue schteisch näb de schue  
süscht luegtisch nid so vrschtört  
hesch dr mage vrdorbe isch dr d liebi abgschtorbe  
bisch usgschtüüret schteisch uf dr schtrass  
*dänksch a rinderwahnsinn a ne jugedblödsinn<sup>1</sup>*  
bisch allergisch uf lüt oder was

ah du hesch hunger ja nimmt mi wunger  
aidschrank arbeits- u obdachlos  
s chunnt niemmer zue dr nid mau dy brueder  
schwarz wirds um di u bodelos  
jaja dasch tragisch woby jitz d frag isch  
gits ächt no z hoffe oder isch d sach gloffe  
i wett fasch säge –

du – los mir mal zue:

es git es paar mönsche da i üsem land dene isch dys lyde nid eifach  
schnuppe  
di dänken a di was sägen i di intressiere sech geradezue für di u  
dyni schicksalsgenossinne u –genosse  
di hei es härz für lüt i dyre lag

das sy di gentechnologe vo basel  
das sy di gentechnologe vo bärn  
nämlech di gentechnologe hei wältwyt  
lüt ohni hoffnig wi di eifach gärn

„Wenn Sie Krebs hätten – wären Sie dann für oder gegen  
Gentechnologie?“

„Wenn Ihr Partner die alzheimersche Krankheit hätte – wären Sie  
dann für oder gegen Gentechnologie?“

---

<sup>1</sup> Kursiv geschriebene Zeilen stimmen nicht mit der gesungenen Fassung überein, ich habe sie nachträglich im Sinn einer Verbesserung geändert.

„Wenn Ihr Kind an einer seltenen Erbkrankheit litte – wären Sie dann für oder gegen Gentechnologie?“

„Wenn Ihnen der Hunger auf der Welt nicht egal wäre – wären Sie dann für oder gegen Gentechnologie?“

lue liebe brueder du lydsch nid vrgäbe  
dys lyde het würklech e sinn  
nämlch als guets argumänt härezhäbe  
mit ussicht uf riisige gwinne  
die wo da gwinne das sy nid mir zwe  
wüll a üs wird ja hüt nume gschpart  
ihri bilanze hingäge sy guldig  
e mafia vo bsundriger art

das sy di gentechnologe vo basel  
das sy di gentechnologe vo bärn  
jaja di gentechnologe hei wältwyt  
lüt ohni hoffnig wi di schourig gärn

für alls wo nid klappet uf üsem planet  
missärnte hunger ölpescht computerabsturz  
für alli geissle vo dr mönschheit  
cholera chräbs aids di schwyzerischi volkspartei  
alli uheimelige nöje chrankheite  
allergie rinderwahnsinn sparhyschterie  
für alli problem wo no niemmer im griff het  
vrschprächen üs d gentechnologen e lösing

zum byspil dr hunger:

saame vo riis u vo mais u vo weize  
wo früecher dr schädling het killt  
mache si widerschandsfähig das fröit se  
utopisch vrnäblet sech ds bild  
wältwyt gits nume no ihri produkt  
u di sy usnahmslos patäntiert  
u tuusigi alti yheimischi sorte  
sy vrbotte vrdorbe krepieret

das dank de gentechnologe vo basel  
das dank de gentechnologe vo bärn  
ja dank de gentechnologe gseh mr wältwyt  
äntlech wider es bitzeli liecht uf üsem schtärn

i schpeetere jahrzähnt we de di gentechnisch manipulierte vire  
us de hochsicherheitsträkt scho lang sy usbroche

we di tüüt ygchoufte patäntierte zuchtmunine u milchchüe vo üsne  
pure a nöje unbekannte chrankheite scho alli verändert sy

we ganzi schwärm vo totalresischtänte transgene laborratte uf  
schwärmmetallvrsüüchten ächer de hungernde alpebewohner di  
letschte tomooffle wägschnappe

ghörsch se de säge das tüej ne jitz leid ja  
das syg iri absicht nie gsy  
si wäre nume de mönsche bim eid ja  
ratgäber u hälfer gärn gsy  
schliesslech chönn si doch ganz gwüss nüt drfür  
sicherheit syg halt niemals total  
gwüssgwüss ou si heige sehr vil drus glehrt  
garantiert bis zum nächschte mal

so rede d gentechnologe de z basel  
so rede d gentechnologe de z bärn  
so rede d gentechnologe de wältwyt

drum hei mir d gentechnologe so gärn

(1992)